

KERWEREDD 1993

Ehr liewe Leit unn Kerwegäschd,
mit unsrer Kerb steht's net zum bescht.

Unser Straußbuwe unn mäd mache dasjohr die Feine,
deshalb stehe mer allee do met de vier Vereine.

Trotzdem griez ich eich all ehr Leit vunn Nerremohr,
wie ner do sitze, ob mit kerze orrer lange Hoor.

All wie ner do stehe, egal vunn wo ner komme,
häß ich eich zu unsrer Kerb "HERzlich willkommen!"

Nadeerlich du ich a all die Fremde begrieße,
die Amis, die Russe unn a die Ostfriesen.

Die Presse uns Fernseh hammer a herbestellt,
die iwwertran die Kerb in die ganze Welt.

Ehr hann eich all do hergeschafft,
ich hoffe nur, aus eigener Kraft.

A beim Petrus hann mer e Stä im Brett,
die Sunn scheint vumm Himmel so richtig nett.

Bei de Musikante hammer uns jetzt das Liedsche bestellt,
"Oh wie schön ist diese Welt."

Ehr Nerremohrer Leit...

Ess Liewesläwe inn Nerremohr
iss schwer gesteert, jo, ess iss wohr.

Daß zieht sich schunn seit Monate hie,
kä Wunner, daß mehr do kä kinner mä krie.

Denn will de Babbe mojens de Mamme an die Wäsch,
do werd drauß uff de Stroß schunn laut gekräsch.

Die Mamme schreckt zusamme unn will sich's grad üwwerlee,
hört mer schunn laut e Bulldog vorriwwer ziehe.

Töff, töff, töff, so schallt's uff de Stroße,
de Babbe hat genug unn steiht in die Hose. -

Er reißt's Fenschder uff - unn was sieht er da?
Ei so werre in Nerremohr die Zeitunge ausgetra.

Daß geht so mojens vunn fünf bis siwwe,
do sieht mer nur noch de Bulldog rumschwirre.

Henn, henn, henn, - schallt's in ganz Nerremohr,
egal ob's naß iss orrer gefror.

Die Musik speelt später dem Bulldogmann:
"O, la, la, l'amour, der Zirkus fängt schon wieder an."

Ehr Nerremohrer Leit...

Bei de Feuerwehr wird's jedes Jahr hart,
denn dann fahre die Leit e paar Tage fort.

Sie treffe sich wie immer drunne am Platz,
unn starte dann gemeinsam zum jährlich Rabbatz.

Die Stimmung iss riesig, kenner dut wanke,
do fällt doch em inn, ei ich muß jo noch tanke.

Inn Lautre uffem Parkplatz bleiwe ner dann steh,
zum letschde Treffe fährt jeder dort hie.

E junger Mann vunn Nerremohr, im Auto noch drei drinn,
rast iwwer die Autobahn a dorthin.

Sie mache noch Schpäßjer unn sinn richtig froh,
unn fahre immer dem schwarze Vectra no.

Do verre de Vectra, daß iss unser Hüter,
in dem Auto sitzt nämlich Kennel's Dieter.

So sahn se sich, kä Gedanke wie's weiter geht,
obwohl de Dieter noch immer uffem Parkplatz steht.

No Bermbach, do fehrts unser Weg uns hin,
bis se merke, daß se in Wiesbade sinn.

No Schtunne erscht, ei ich bin richtisch platt,
merkt de Martin erschd, daß das Auto e anner Nummernschild hat.

Die Musik speelt jetzt denne Bursche ganz froh,
"Ess nächste Mal fahr'ner mem Fahrrad no."

Ehr Nerremohrer Leit...

E Mann vunn Nerremohr fand's schunn immer scheen,
ämol im Läwe in Rente zu gehn.

Sechs Kinner hat er großgezoo,
vier unner de Haub, iss der Mann froh.

No dem ganze Schufte, johrinn, johraus,
hatt er endlich sei Rentebescheed draus.

Er konnt's jo schunn gar nimmie abwarte,
unn wollt sich grad setze in sei Garde -

Do fällt dem jo inn, Gott vergelt's,
heit iss jo Rentnertreff uff de Fels.

Er holt noch de Jobbe, die Schuh unn de Hut,
unn macht sich uff die Fels voll frohem Mut.

Was hat er gelacht unn sich gut unnerhall,
ach, es hattem do drowwe jo so gut gefall.

Der Nummedach war e Schicksalsdach in seim Läwe,
denn jetzt dut er jede Mittwoch e klenner hewe.

A wenn um fünf ess Vieh kreischt, was iss schun dabei,
daß kann a ess Gerda mache unn füttere es Hei!

Die Musik speelt nothin dem Rentner behend:
"Moje schpeel ich a noch in de Rentnerband."

Ehr Nerremohrer Leit...

Im Mai war vunn Nerremohr e Ehepaar,
in Gries uff'rer Hochzett als Gäscht vorgefahr.

Zu de Trauung sinn se gelaaf net üwwerzwerch,
ess Wetter war schä - unn es war net weit bis an die Kerch.

Als die Trauung in de Kerch war erumm,
han se de selwe Weg als Hemweg genumm.

Soweit war alles schunn gut geloff,
am Haus vunn de Braut hann se sich dann getroff -

Fer in die Autos in se steije,
zur Fahrt uff die gesellschaftlich Hochzeitsfeier,
in Sand in dem Hotel am Weiher.

Die Autos hann sich uffgestellt,
doch zur gleiche Zeit hat sich e anner Hochzett dezugesellt.

Die Fahrt ging los met Tute unn Getose,
hinnerm Brautauto klappere die Dose.

Doch als de Konvoi klei hinner Gries,
anstatt no rechts no links abbieht,

do mennt die Fraa vunn Nerremohr,
das done kommt mer komisch vor.

De Werner beruhigt's Erika: "Was haschte dann fer Not,
do verne dra im Auto fahrt jo a noch die Got."

Bestimmt iss de Kaffee noch net wääsch,

unn deshalb fahre die noch e bissje im kräs.

Die Fahrt ging noch weiter bis Martinshöh,
dann blieb die Hochzettsgesellschaft endlich steh.

Unn wie es Hochzettspaar aussteiht, stellt sich eraus,
das war jo garnet die richtig Braut mem Strauß.

Die Musik spielt jetzt dem Ehepaar apart:
“Daß war die reinscht Metzjerfahrt.”

Wenn's Frühling werd unn die Temperature steije,
unn a mancher uff de Wissdut leije,

do kommt uffem Berg außemme blaue HAus,
e junger Mann mem Motorrad eraus.

Er guckt sich noch um, dut die Stern noch krause,
dann hert mer ne de Berg erunner brause.

Als er de Helm abzieht unn mer sieht die blonde Hoor -
ei, das iss jo de Metzjer vunn Nerremohr.

Er iss ja so tüchtig - johrinn unn johraus -
unn meßt sei Kräfte im Schlachterhaus.

Amme Moje, ganz frieh, kann mer im Hof dann sieh,
wie e Bauer bringt e großes Stick Vieh.

De Metzjer fräät sich, in de Hand noch sei Stulle,
mei liewer Mann, was für e schöner Bulle.

Er nemmt ne am Strickelche, noch net richtig wach,
doch hat er die Rechnung ohne denne Bulle gemach.

Das Vieh geht dem dorch, wie im Suff,
ämol iss de Metzjer vorne, ämol owwedruff,

doch kurz bevor das Stick Vieh kann ausbreche,
dut sich de Metzjer ganz fürchterlich räche.

Er halt's Vieh ganz kerz, leht o uff die Stern
de Schußapparat unn jaht e Kugel ins Hern.

Met so zwä Hobbies bleibt unser Kalli jung,
hoffentlich hat er a e guti Versicherung.

Die Musik speelt dem Mann adrett:
“Legt de Metzjer mit dem Bulle einen Tango auf's Parkett.”

Ehr Nerremohrer Leit...

Do driwwe, glei hinnerm Bahniwwergang,
do wohnt de Herr Sauermann.

Kerzlich hat er sich kaaf e neier BMW,
e anner Audo wär fer denne a viel se klä.

Er wienert sei Audo, putzt unn poliert -
inne wie auße, das geht wie geschmiert.

Dann kommt noch de Ufftrag vunn seiner Fraa,
de Babbedeckel unns Babier werre noch an de Container gefahr.

Dort awwer war's batschig und moraschtig,
das bringt denne Mann ball uff hunnertachtzig.

Er guckt an sich enunner uff die Schuh, o Schreck, o Graus,
doch er wäs sich se helfe unn zieht die Schuh efach aus.

Unn so fahrt de Erich häm, selbst iss der Mann,
unne barfuß unn die Schuh efach in de Hand.

Die Musik speelt dem MAnn uff seinen Wegen:
"Barfuß im Regen"

Ehr Nerremohrer Leit...

Die Leit im Derf wäre immer lieber,
do gebt's zwä Männer, die sinn fascht wie Brieder.

Die dun net nur zesamme lache,
nee, die gehn a noch gemeinsam schaffe.

Der Ä hebt die Wiss aus, de anner zieht Wänn,
nadeerlich hann se a Helfershänn.

Ämol schaffe se verre, s'annermol do,
der Ä baut e Schwimmbad, de anner e Klo.

Als das Häusche dann fertig iss, ach iss das schee,
jetzt kenne mer während dem Schaffe a pinkele geh.

E weisi Kloschissel met em große Loch,
unn an de Wänn Blettscher vunn Villeroy unn Boch.

Dezu e Holzdeck, weiß unn glatt,
ei das Scheißhaus iss schenner als drowe mei Bad.

Unn dann erschd es Schwimmbad, versteckt hinner Hecke,
do kann mer sich sogar noch im Wasser vestecke.

Was ich eich jetzt saa, das iss net zum Lache,
in Nerremohr kann mer jetzt schunn de Freischwimmer mache.

Unn wolle se mol in Ruh enner hewe oder nur grille,
do sinn die net weit, entweder in Bonnerts orre in Brille.

Die Musik speelt denne zwä Schlaue:
“Schaffe, schaffe, Häusle baue

unn a mol nom Schwimmbad schaue.”

Ehr Nerremohrer Leit...

Vorsjohr an de Kerb, wenn ich do noch dran denke,
do hett mer de Schoppe als kenne veschenke.

Denn unser Hall war voll, doch net vunn Bekannte,
zwä Drittel dodevunn warn Asylante.

Ä Glick, kammer do nur sah,
sonscht hätt sich unser Kerb gar net getrah.

Jetzt isses Hotel zu unn mer losse Ruhe walte,
denn es iss im Gespräch e Heim fer Alte.

Unser Rentner fräe sich, die finne das schä,
jetzt sinn se in Nerremohr ball nimmi allä.

Es Restaurant iss schunn uff, do kenne se dann hocke,
um gemietlich emol zesamme zu zocke.

Unns nächschd Johr an de Kerb, do dumer uff emol gucke,
do mache die Rentner die Straußbuwe.

Ehr Musikande speele jetzt uff:
“Ja, ich bin Rentner von Beruf”

Ehr Nerremohrer Leit...

Wie das im Dorf iss so Sitte,
egal ob von vorre, hinne orrer in de Mitte,

do werd samschdachs die Gass gekehrt,
das iss eigentlich ebbes, wo sich niemand dran steert.

Wo awwer die Juchend soll die Stroß als kehre,
dun se erschd e halwi Stunn dischbedehre.

Orrer knobeln se, wer iss heit an de Reih,
das geht manchmol net ohne Geschrei.

Do hinne in de Hauptstroß dut e Märe,
stunnelang als samschdachs kehre.

No de Audos guckt's, wann se kumme vom Bettchauser Wald,
bis se verschwinne hinner de Kurv alsbald.

Unn uff em Gänsehiwwel dut als ens kehre die Rinne,
awwer die Haufe wegsemache kommt dem net in de Sinne.

Drum konnt mer a kerzlich im Amtsblatt lese,
daß es net nur drum geht, sauwer se fege.

Es sollte, so stand es geschrieben, ich will nimmand foppe:
"De Kehricht im Ortsteil Niedermohr sollte entfernt werden,
damit sich die Gullis net vestoppe."

Die Musik speelt denne zwä Mäd ganz gepflegt:
"Auf die Bäume, ihr Affen, der Wald wird gefegt."

Ehr Nerremohrer Leit...

Beim Wettbewerb "Unser Dorf soll schöner werden", hann mer de erschde Preis,
unn das alles nur durch unser Mühe und Fleiß.

Die Häuser wurde noch schnell gestreck vunn e paar Schlaue,
deshalb hann mehr jetzt a so veel Blaue.

E blaues Haus iss doch schön, saht a jeder betont,
die Farb war bestimmt e supper Angebot.

Die Altjugend iss supper, sag ich im klare,
deshalb sieht mer a jetzt so viel Motorräder fahre.

Passiert emol ebbes unn iss die Lenkschang krumm,
das macht nix, de Ä wohnt bei Schaller unn Thum.

Sie hocke inn Ledder uff ehre Maschine ganz locker,
ei mer sinn stolz uff unser Nerremohrer Rocker.

Unn hert mer lautes Brumme, iss net ae Flieger zu schief,
bei uns heit fliege nur die Motorräder werrer zu tief.

Die Musik speelt denne Fahrer ganz schlapp:
"Lissje, ich hol dich mem Motorrad ab."

Bei unns im Dorf iss enner bei de Feierwehr vunn Kopf bis zu de Zehe,
der losst rein gar nix iwwer die Feierwehr gehe.

Pünktlich iss er immer bereit,
zur Feuerwehrrübung zu jeder Zeit.

A dut er helfe, die alt Bump renoviere,
die wo als Museumsstick die Hall dut ziere.

Wenn die Siren geht, kummt de Frank als erschder gerennt,
unn wäs meischdens a schunn, wo's brennt.

Er hat e Ohr fer die Siren,
a wann se net ertönt vunn dehäm.

Vorsjohr iss die Siren nachts in Minschwiller gang,
do iss de Frank uff die Feierwehr geflitzt im fünfte Gang.

Doch im Dorf war Ruhe und Stille,
falscher Alarm, das war sein letzter Wille.

Die Musik speelt dem Mann mit viel Trara:
“Hurra, hurra, die Nerremohrer Feuerwehr iss da.”

Ehr Nerremohrer Leit...

Im letschde Johr am Heilische Abend,
hat mer gehört drei Pferde traben.

Es war a de Kurti met seiner Freundin debei,
unn noch e Packgaul, das war nei.

Ehr Ritt ging in de Jungebusch an die Danne,
denn sie wollt noch e Christbämche fange.

Der Mann setzt die Säh o, doch wie de Baam kommt zu Fall,
do gebt's im Jungebusch e Rieseknall.

Die Geil werre schei unn renne wie de Dunner,
in vollem Tempo de Waldweg enunner.

So e Pech, dem Kerl wird's bange,
ä Gaul konnt er grad noch fange.

E Pferdefreund sieht die Geil unbemannt galoppe,
unn dut sich gleich in sei Audo hocke.

Dann fährt er denne Ausreißer hinnerher,
eraus se finne, wem die sinn, war gar net schwer.

Denn gestoppt hann die uff jede Fall,
do hinne vorm Kurti seim Stall.

Die Musik speelt jetzt wie ein Traum:
“O Tannenbaum, o Tannenbaum,
am Gaul do hängt e Weihnachtsbaum.”

Ehr Nerremohrer Leit...

So ehr Leit, gucken mich nochemol a,
denn nothin bin ich nimmi da.

Ich merk schunn langsam, wie mei Hals dut krache,
no denne veele vezehlte Sache.

Ich möcht mich ganz herzlich bei eich noch bedanke,
unn gleich nothin dumer zesamme enner tanke.

Unn enns loss ich eich trotzdem noch wisse,
dun eich no de Redd net glei verpisse.

Wenns Nachbardorf a nennt, mer kennte net feiere,
dun mer uns dodriwwer iwwerhapt net eiere.

Doch bevor mer Esse und Drinke genieße,
dun mer es ershd noch unser Kerwestrauß mit Wein begieße.

“DU SOLLSCHD ES GANZ JOHR HENKE,
SO DAß MER NOCH LANG A UNSER NERREMOHRER KERB SERICKDENKE!”

Unn hoffentlich dusche a noch lang halle,
unn loscht net glei alle Blätter falle.

Bevor ich zum Schluß kumm, hann ich noch schnell
e paar Worte fer die Werkvolkkapell.

Bei eich all, ehr Musikande,
möcht ich mich noch recht herzlich bedanke.

Ich schaff mich jetzt erunner unn sa: “Auf Wiedersehn”,
unn feiere mer unser Kerb noch schön.